

## Li ferii

Ferii, jorna sacri, a li dei dedicati  
e a lu riposu, tuttu l'annu disiati.  
Solitudini spettrali di cu arresta in città',  
'nfuddimentu di cu 'unni e gghiè già' scappa'.  
Uri e uri 'nterminabbili, semu 'nculunnati,  
'nta li machini un furnu oramai divintati,  
di tanti cosi o di nenti stracarricati,  
quannu nanni e armali avemu lassati  
'nna l'ospedali o 'm mezzu di li strati,  
futtennuminu chi d'affettu su' privati.  
Si curri p'arrivari cchiu' prestu chi si po',  
un scontru, la morti e lu preju nni passo'.  
Spettaculu di 'nfervu li spiaggi dorati,  
vugghinu li genti, carnai su' addivintati,  
specii quannu 'mpazza furiusu ferraustu  
tutti a la tintarella, sinno' 'un c'è gustu.  
Nni 'mmeccchia la peddi, parennu forzati,  
eritemi e papuluna, pero' semu abbronzati.  
'Nta li campagni si va in villeggiatura,  
'nna tutti li muntagni si cerca la friscura,  
s'addumanu fochi, si fannu li falo',  
s'abbrucianu voschi e la natura 'un cci po'.  
Genti 'mpazzuti 'nna tutti li cuntrati  
sordi sminchiamu, pero' semu abbronzati.  
Nenti cci fa chi picciuli cci n'è picca,  
cu campa paga e cu tasta si licca.

## Filosofia minuta

Spissu iu mi dumannu chi cci campamu a fari  
quannu ch'un foddi viu 'nto chianu caminari,  
o quannu un vecchiu viu, siccu, allascutu, stancu  
purtari l'ossa a spassu, sirutu supra un vancu?

L'angoscia chi mi veni mi pigghia 'i cannarozza,  
pinzannu su' filici? mi strinci puru 'a strozza.  
Chi cosa veni a ddiri arrivari a la vicchiaia,  
chi gustu c'è a la vita si si' tuttu 'na chiaia.

Quannu unu è malatu, jittatu 'n funnu a un lettu  
comu la notti dormi o attrrova 'u so' risettu?  
Paci 'un cci nni pozzu e un sacciu soccu fari,  
mi veni spissu 'i chianciri o di bistimiari.

Ma bistimiari a cu, s'un criu propriu a nenti;  
cu' cu mi l'ha' pigghiari, cu' cu pozzu sfuari?  
Mi dassi pugna 'n testa, facissi lu 'nfurcatu  
p'aviri 'na risposta ch'ancora 'un m'haiu datu.

Iu 'un cci attrrovu scopu au nostru 'nfuddimentu,  
sempri arraffari sordi, perdiri 'u sentimentu.  
Cu' tutti c'è 'na sciarra, cu' l'autri nni scannamu  
e p'arrivari dunni, curremu e nn'affannamu?

Macari lu capisciù quannu semu picciotti  
cu' l'anghi rusicari li cchiu' duri viscotti,  
puru è giustificatu affuddarisi 'nto 'nfuscu,  
a 'uvitati fari p'un arristari uscu.

Ma po', pi' fari soccu, si tuttu am'a lassari,  
si dintra lu tabbutu nenti cci poi 'nfilari?

Eppuru cci su' vecchi chi nun si vonn'arrenniri,  
fannu 'u diavulu a quattru e tuttu hann'a pretenniri.

A iddi iu cci cunsigghiu, damuni 'na carmata,  
lu dicu puru a mia, 'un è cosa stunata:  
si bbonu nni finisci, passata la nuttata,  
continua l'esistenza, l'arba è già spuntata.

## Inzonnia d'amuri

Quasi tutti li notti  
lu sonnu m'è nemicu,  
mi pigghia li pinzeri,  
li sbota, li rivota, li stravia;  
comu ventu d'aprili  
assicutannu va li nuvoli  
affucannuli nni lu mari  
dunni è nivuru e prufunnu  
e po' li tumma a galla  
suttancapu 'nta la testa  
cu' scoppiu feroci di tempesta,  
li scotula, li ciùcia, li mazzia  
li jetta 'na lu focu ardenti  
pinzannu sempri a tia,  
lu me' 'nfernū viventi,  
martoriatu d'amuri  
cunnannatu 'nnuccienti,  
ammargiatu di suduri  
attignatu di jelu.  
E li pinzeri chiossà satarianu,  
comu griddi 'nta ristuccia  
aprinu l'ali senza abbentu,  
volanu pi' 'n anticchia,  
s'accuetanu un mumentu,  
ma doppu quarchi attimu  
ritorna 'nna lu cori lu turmentu,  
sunnannu ancora a ttia,  
e lu disiu cchiù accrisci  
ed è un chiovu sturtizzu  
chi trasi, spirtusa, spacca.  
e giru suatasupra lu capizzu.

## E iu ti cantu

E iu ti cantu  
cca e 'nniegghiè,  
o fimmìna amurusa,  
chì mi scueta  
lu lampu di li to' occhi di zingara;  
chì m'annorva  
lu splennuri di du' stiddi,  
chini di ducizza,  
di vasari 'nta 'na notti  
ardenti d'amuri;  
ch'un mi da' requii  
'naggiustata veloci  
di li nivuri capiddi;  
chì mi turba  
'n'annacata vizzusa  
di li snelli to' cianchi;  
chì mi eccita  
lu to' curaddu 'ncastonatu  
di bianca madriperna,  
quannu si apri  
a 'na risata argentina;  
chì mi fa' chianciri  
quannu tennira abbrazzi la to' criatura;  
chì mi fa' soffriri  
quannu li to' bianchi capiddi  
lacrimanu un figghiu luntanu;  
chì mi fa' mòrirri quannu  
lu sangu di li to' visceri  
jetti 'nta un munnizzaru;  
chì mi stupisci  
quannu ti chiuri 'n clausura,  
sepolta viva, in un cunventu.

e picch'issu iu ti cantu,  
juntu oramai a sissant'anni,  
comu mai t'haiu cantatu,  
o fimmmina scanusciuta d'ogni età,  
tu chi si' l'autra mità di lu celu.

## Lu jardinu segretu

Haiu un jardinu segretu  
dunni sta ‘nchiusa  
la storia di la me’ vita  
fatta di bruciareddi;  
lu ciavuru ‘ustusu di lu pani  
quannu lu furnu era  
lu cori di la casa  
e me’ matri stanca  
s’asciucava lu sururi;  
li robbi stinnuti a li curdini  
cu’ furceddi a lu celu;  
la sita di l’ali di li griddi  
sutta li irita di piccilddu;  
la maggia di li lucciuli,  
lumeri di picuraru,  
chi s’addumavanu la sira  
comu stiddi, ‘nta li manu;  
lu profumu di gioventu’  
e ‘na vasata scippata  
a ‘ddu ciuriddu,  
un garofalu biancu  
e lu so’ oduri novu;  
l’allegria a diciottanni  
e tri cumpagni morti picciutteddi;  
la famigghia di me’ patri e po’  
li me’ figghi, nichi, cu’ Rosa,  
me’ mugghieri.  
M’abbasta chiuriri l’occhi  
e ogni vota,  
lu jocu di la memoria  
mi filtra piatusu  
‘stu passatu.

## **Lu jardinu du re**

Talia c'è festa, s'abballa,  
ascuta li musichi e canti.  
Dammi la manu, ti pregu,  
felici d'essiri amanti  
vulamu cuntenti a la danza.  
Pi' la to' granni biddizza,  
pi' li sguardi to' duci,  
vicinu a la fonti, sbucciati,  
'un trouv cchiu' rosi pi' tia,  
su' tutti ammusciuti.  
Una sula cci n'è, s'attrova  
'nto jardinu du' re.  
La me' manu vulissi pigghialla  
ma 'un avi curaggiu abbastanza.  
Lu to' cori percio'si spezzau  
e accussi', arma me', ti pirdiu.

## Sonna, biddizza

Sonna, biddizza, sonna.  
Li to' suspira levi  
su' riordi cuntenti.  
'Sta sira mi sciogghi lu cori  
lu focu ardenti  
di la luntananza.  
Comu nun chiancirì  
d'amuri e ducizza  
si li to' suspira pi' mia  
arrivanu all'arma  
'n funnu?  
E càrinu lacrimi filici  
abbunnanti.  
Sonna, biddizza, sonna.

## La lingua siciliana

Misera, strafuttuta parlata siciliana,  
ti sintia ‘nta panza di me’ matri a milinciana  
e abbunnanti ti sucavu ‘nta lu pettu a mostra,  
propiu di l’iniziù, quannu uffria la culostra.

Di tia ‘nsaziabbili sempri m’haiu pasciutu  
e li vari idioletti to’, pi’ beru, haiu canusciutu  
e ‘n tutti li cuntrati e in ogni cantunera,  
m’ha’ parsu sempri duci a la stessa manera.

Ora e da un pezzu li tempi su’ canciati,  
parlannu bastardi cu’ lingui ‘mmiscati,  
pi’ scimmiuttari la lingua triculuri  
ch’ognura sintemu di radiu e televisuri.

Ma ‘na cosa assai gravi, viremma ch’am’a ddiri  
è ch’anchi l’italu idioma distinatu è a finiri,  
picchi’ ‘nta ‘stu villaggiu ch’è sempri cchiu’ globbali,  
sulu spicchiannu ‘ngrisi nui spiccheremu l’ali.

Quindi, d’a lingua nostra, poviri ‘nnammurati,  
cunurtamuni ‘nfelici e ristamu rassegnati,  
chisa’ soccu nn’aspetta di cca a pochi anni,  
si ancora quarchi gioia, opuru tant’affanni.

Pi cui s’ha lingua nostra ancora av’ a campari,  
puisia s’av’ a scriviri, senza mai stancari.  
E lui chi ‘n funnu semu tutti figghi di Ciullu  
cu’ forza ribademu ch’ha lingua ‘un è trastullu,

ma è pena sufferta cu’ ‘impegnu e cu’ cunzigghi,  
amuri pi la matri, di lui urtimi figghi,

certu cchiu' picca cosa di 'Gnaziu o di Giovanni,  
ch'ormai su' 'nta li celi, di picca o di tant'anni.